



4. Oktoberi 2022

UKA2022/65

**Nunatta kangiani aalisakkerfivinnut tulaassisussaatitaanermik piumasaqaateqalersitsisinnaaneq pillugu Naalakkersuisut misissueqqullugit peqquneqarnissaannik inatsisartut aalajangiiffigisassaattut siunnersuut. Nalunaarusiaq inatsisartunut UKA2023 nallertinnagu inatsisartunut agguanneqassapput.**

(Inatsisartunut ilaasortaq Mala Høj Kuko, Siumut)

Siumumiit Mala Høy Kuko-p siunnersuutaa imaattumik oqaaseqarfigissavarput.

Nuannaarutigaarput siunnersuuteqartup soorlu qulequtsiinnermini oqariartuutigigaa Tunup sineriaani nunami tunisassiorfinnut tunisisussaatitaanerup atuutilersinneqarnissaanut periarfissamik Naalakkersuisut misissueqqullugit peqquneqarnissaannik inatsisartut aalajangiiffigisassaattut siunnersuut suliarineqassasoq.

Siumumiit nalornissutiginagu nunatta kangiani aalisarnikkut inerisaasoqarnissaanik oqariartorneq tapersorsorippat naqissusissavara. Aatsaammi taamak aalisagaqartigilerneranik piffimmi atuisut oqariartuuteqarput, tassungalukillinneq tupinnanngitsumik inatsisartut periarfissarsiortoqarnera paasinarluinnarluni.

Aalisarnikkut periarfissat tunitsiviit amerlagisassaangillat, Kuummiuni ingerlanneqartoq kisiat tunitsivinni periarfissaavoq, tunitsivik periarfissatuaasoq umiarsuarmik anginerusunik tulaffigineqarsinnaanngitsoq ilisimaneqarpoq. Taamaattumik talittarfeqarneq unamminartut ilagivaat, Tasiilami tulaassisussaatitaaneq atuutilissappat unamminartut ilaatigut talittarfiup mikivallaarnera ilitsivikippallaarnera oqaatigineqartarpoq. Minnerunngitsumik suna pineqarnersoq paasissallugu pingaaruteqarpoq, qerititsivissorneq pineqarpat, imaluunniit nereriaannanngorlugit suliareqqiisarfirmik fabrik-imik tulaassisussaatitaaneq pineqarpat qanoq inerisaasoqarnissaanik periarfissarsiussisoqassappat tamakku pingaaruteqartut ilagivaat.

Siunnersuuteqartoq Mala Høy Kuko paasisinnaalluarpara suliffissaaleqinerujussuup akiorniarnerani periarfissatut una siunnersuut tikkuarsimammagu, qularutissaanngitsumik suliffissaaleqinermut akiuniarnermut kiisalu akileraarutitigut aningaasarsiorfigilluarneqarsinnaanera oqariartuutigalugu.

Siumumiit isumalluarfigaarput naalakkersuisut suleqatigiissitamik aallartittoqarnissaannik pilersaaruteqarmata, isumalluarneq minnerulersinngilaat, kiisami ukiorpassuarnik aalisarnikkut oqarluartaarneq piinnarnagu timalimmik piorsaaniartoqarnera pisussanngorpoq, Siumumiit tamanna suleqataaffigeqqissaassagippat qularineqassanngilaq.

Soorlu Siumumi anguniakkatsinni ersarissumik allaqqasoqartoq. Aalisarnikkut inuussutissarsiorneq nunatta nappatigaa, taamaattumillu ineriartortittuarnissaa naleqqussartuarnissaalu pisariaqarluni.



Aalisarnikkut aningaasarsiornerup annertusartuarneratigut pisassiisarnerit avammullu niuernerup aaqqissuuteqqinnerisigut Nunatta imminut napatilermissaanut aqquutissiuussissasugut.

Nunatta kangiata imartaani aalisagartassiissutaasartut tamarmiusut amerlanerpaartaasa Nunatta aalisartuinit aalisarneqartarnissaat qulakkeersimajuarneqassaaq aammalu Nunatta imminut aalisagartassittarnera annertuninngortinneqassaaq. Kangiani aalisarnerup tunitsiveqarnerullu immikkut pimoorullugu siuarsarnissaa anguniarneqassaaq.

Naalackersuinikkut suleqatigiissitanik pilersitsisoqarsimasooq oqaatigineqartoq Siumumit tigulluarparput, naatsorsuutigalugu tamatuma kingunerissagaa tigussaasumik piviusut tunngavigalugit inuussutissarsiuteqartunik suleqateqalerneq.

Aalisarnermut Piniarnermullu Naalackersuisoqarfik suleqatigiissitap suliai eqqarsaatigalugit ikorfartuisuussaaq. Naalackersuisut taamatut suliaqalernerat nunatta kangianeersuusugut isumalluarnermik neriummillu pissarsiffigaarput. Siumut sinnerlugu qilanaarluta suliap aallartinnera suleqataaffigissagippot oqaatigeriissavara. Naalackersuisullu allannguutissatut siunnersuutaat ilalerlugu. Taamaattoq kissaatigissavarput, suleqatigiissitat sulinissaat ullulerneqassasoq, piffissalersuinngikkutta qaqugukkut naammassinnittoqartarnissaanik qaammaassaqarnerunavianninnatta.

Naggataatigut Inatsisartuni immikkoortoq 123-i sapaatip akunnerani kingullermi sammivarput. Tassani pineqarput Nuup, Qasigiannugit Aasiaallu pilersorneqarnerannut erngup nukinganik nukissiorfinnik pilersitsinissamut aningaasalersuinermit ingerlatsinermullu killiliussatut atugassarititaasullu pillugit allanngortitsisoqarnissaa. Tassunga atatillugu Siumut isumaqarpoq, nukissiorfiliornerit allat pisariaqartut ilanngullugit eqqartortariaqarivut, taamaattumillu naatsorsuutigaarput – assersuutigalugu Tasiilami nukissiorfiup allilertariaqarnera – ilanngullugu suliarineqassasoq. Tasiilami inuussutissarsiornikkut toqqissisimanartumik aallartittoqarsinnaanngilaq, nukissiuutit pisariaqartinneqartut naammassineqarsimannippata. Pisortallu tassani sallsaallutik suliaasaqarput.

Siumumit taamak oqaaseqarluta ataatsimiititaliamut susassaqartumut suliarilluarneqarnissaa kissaatigissavarput.

Lars Poulsen, Siumut